

四庫全書

集部

欽定四庫全書

宋元詩會卷四十八

兵部主事陳焯編

杜範

字成之黃巖人其從祖燁受學朱熹範得從祖之傳家學益著登嘉定元年進士由金壇令累遷祕書監拜監察御史又以御史累遷至樞密院同知官至右丞相其讜論直道多見於為御史時範恥言不行而徒冒遷擢之榮故屢疏求罷理宗心知其賢但優之以爵位究莫能盡從其言也年未八旬卒贈少傅謚清獻有詩五卷

夏夜雲月不明有感

天色未清霽浮雲翳層空朦朧玉盤質髮髯辟絮中瓊  
宇本瑩徹一髮不可容胡為受掩蓋萬象歸冥蒙誰能  
召風伯掃氛建膚功中天縣清光娟娟萬里同

募兵

召募古來有今者何其艱文書急如雨取辦都保間百  
夫不當十一夫費千鎰恐彼嗜利徒無能禦國患老母  
與少婦蓬頭走江干挽之不得留悲泣聲徹天母曰我

壯子婦曰我健夫衣裳破無補田園荒未鋤一朝棄我  
去饑寒我何如我欲從汝行生死同一隅抑恐情軍氣  
累汝重汝辜今業已分離把袂立須臾拭淚為汝言汝  
亦無我虞戮力濟王功期剪兔與狐

良月遊水樂

久矣聞水樂邂逅作此遊林立攢萬石曲逕穿深幽  
豁訝開古洞下有清淺流惜哉非古音噴薄皆人謀流觴  
飲山綠風鬢吹颼颼欲歸興未盡攜手湖上樓斜陽獻

萬狀浩以百目收白鳥去復還翩翩良自由我本山林  
人對此多慚憂歲月不我與宴閒其可偷便合作歸計  
老矣安所投世事皆漫爾政恐空白頭

詠芙蓉與菊花

秋光濃欲滴結束東籬花糝糝紛點綴戰戰相參差淵  
明太好事言樂酌流霞誰云制頽齡為與霜爭華映水  
開芙蓉麗色如春葩謾以拒為名青女不能加持此問  
淵明何乃吝齒牙門外風如箭黃落滿天涯

送趙寬堂

兩片南山雲偶爾連空飛  
一去向空谷一留伴殘暉  
招浙江渡激激風吹衣  
仰頭有鴻鵠孰使心事違  
何時黃山畔把酒話昨非

再次沈節推送春韻

子規泣訴春山頭芳草連天不盡愁  
紫陌遊人在何處空有顰眉人倚樓  
溪上悠悠櫂木蘭溪邊落紅紛紛斑斑  
嗟哉片片逐流水新篁忽長千琅玕  
多少閒愁推不去

欲問春歸杳無處少年知己負心期尊酒從今樂事稀

次鄭府判金字韻

巖嶇來北固邂逅識南金未覺人間役欣同物外心燈  
花殘夜半桂子落秋深細聽朱絃曲寥寥大雅音

途中

官身驚昨夢山店是回程郡事關新舊人心屬送迎塵  
衫纔幸脫野服要須成世路如川險歸途却自平

水簾谷

巨崖森四立，硇洞露前簷。  
鳥道穿危磴，虬松奮老髯。  
巖高全似砌，水小不成簾。  
雖倦猶貪看，中宵澗雨添。

### 徐鹿卿

字德夫，隆興豐城人。博通經史，以文學名於鄉。嘉定十六年，進士調南安軍教授。授重，申周程之學。辟福建安撫司幹辦公事。改知尤溪，事會真、德秀守泉。辟宰南安，邑以大治。遷國子監主簿，入對陳六事。上嘉納之，改密院編修。值右史方大琮編修劉克莊正字，王邁以言事黜。鹿卿為詩贈之，亦坐貶。太學諸生作四賢頌，出知建昌軍。歷江東運判、代岳珂提舉太平茶鹽，提刑、潮東，用檄衢州推官馮惟說決發獄，觸忤當路，自劾罷歸。八召不起。宰相杜範遺書力趣之。鹿卿乃出，擢太府少卿，歷崇政



說書權吏侍兼侍講  
引年致仕卒謚清正

士友見和七月七日曝書依韻謝之

寒儒家世派南州天遣芹宮竝俊遊  
劍水章江千里月天孫河鼓一番秋  
晒書舊事聊同郝聯句新聲恐類侯  
隔歲槐黃頻入夢曾知山角已生不

湛泉酌餞黎丈屬和其詩

幾人林下賦歸休公獨翩然汗漫遊  
味道不妨寒似水入時須用曲如鉤  
從來鄰父邀皆去底事官曹挽不留

後夜相從那復得月明千里故山秋

陳府判邀遊梅關

庾嶺蒼蒼古復今公餘杖履愜幽尋  
兩崖峭壁風霜骨一片清泉佛祖心  
靜浣世緣揮酒椀更添春色上梅林  
冥撥翻覺詩情拙滿眼皆詩祇用吟

勸農

竹馬兒童喜欲狂循良太守似龔黃  
倉庚百囀蠶桑啟布穀一聲稂稻香  
耕鑿盡陶邠國化嬉遊已徧舜民鄉

文書便合登高閣為說東郊入務忙

劉克莊

字潛夫莆陽人從學真西山用蔭補官令建陽移  
仙都以詩禍中錮十年端平初召對賜進士出身  
直史館出為福建提  
刑卒其詩號後邨集

象奕一首呈葉潛仲

小藝無難精上智有未解君看橘中戲妙不出局外屹  
狀兩國立限以大河界連營稟中權四壁設堅械三十  
二子者一一具變態先登如挑敵分布如備塞盡銳鼓

吾勇持重伺彼怠或遲如圍莒或速如入蔡遠砲勿虛  
發冗卒要精汰負非絲寡少勝豈繫彊大昆陽以象奔  
陳陶以車敗匹馬郭令來一士汲黯在獻俘將策勲得  
雋衆稱快我欲築壇場誰可建旗蓋葉侯天機深臨陣  
識向背縱未及國手其高亦可對狙捷敢饒先諱輸每  
索再寧為握節死安肯屈膝拜有時橫槊吟句法尤雄  
邁愚慮僅一得君才乃十倍霸圖務并弱兵志貴攻昧  
雖然屢克獲詎可自侈汰呂蒙能馘髯衛瓘足縛艾南

師未宜輕夜半防砍寨

荔支巖 洞內小石如荔支者無數

異境悶神奇一罅通深阻呀然張蟾吻光怪腹中貯始  
來尚覲面稍進但聆語迴頭失塵世束縕行里所石房  
容十客石柱徑丈許眠葵若將吠墮果疑可咀平生聞  
化城今見玉樓櫓陟高既趨捷循狹或偃僂忽逢路窮  
處淺浪隔洲渚心知仙聖居欲到無飛羽向非薪燭力  
往還何異瞽重遊儻未卜聊向詩中覩

棲霞洞

往聞耆老言茲洞深無際閭中或識路塵外別有世幾  
思絕人事齋糧窮所詣棋終出易迷炬絕入難繼孤亭  
渺雲端于焉小休憩憑高眺城闕擾擾如聚蚋盡捐滓  
穢念遂有飛舉勢山靈媚清遊雨意來極銳濛濛濕莎  
草浥浥涼松桂暝色不可留惟望巖扉閉

五月二十七日遊諸洞

來南百慮拙所得惟幽尋矧余玉雪友共此丘壑心江

亭俯虛曠穴室窮邃深是時薄雨收白靄籠青岑棄輿  
追野步却扇開風襟炎方豈必好差遠輦鼓音且願海  
氛息莫問神州沈徘徊惜景短留滯畏老侵昨遊感鶯  
哢今至聞蟬吟常恐官事繁佳日妨登臨譬如逃學兒  
汲汲貪寸陰何因釋膠擾把臂偕入林

戴秀巖

戴秀者兵卒也得道于此

茲巖視諸峰厥壯尤崢嶸舊為碧蘚封新有朱棧橫縻  
腰尚恐墮束炬差可行外狹中乃寬始闇俄忽明仰窺

神魄悸俯顧形骸輕遂覽丹爐基微聞玉鼓聲源深足  
力盡路黑雲氣生不辨晝夜分恍疑世代更嘗言學神  
仙所得由專精豈無諸名士羨彼一老兵欣然約同志  
嗣此將尋盟安知無白鹿絕頂來相迎

和太白潯陽紫極宮感秋

翰林兩仙人偶來聽風竹蕭蕭玉千竿采采綠一掬少  
時負不羣中歲乃見獨嗟余長十年所至戀三宿徑當  
還笏歸奚俟揲著卜夜卽與儋耳老大費往復宜州殿



其後路險車又覆山中采芝去舍下炊梁熟

上已與客遊水月洞分韻得事字

勝踐造物慳貧交世情棄昔戒十客來旦無一人至惟  
余暨兩君鼎足坐水次歡言天氣佳誰謂風土異高吟  
雜騷選序酌逮髻穉滌厓去惡詩捫石認缺字古來幾  
楔飲傳者纔一二蘭亭感慨多未了生死事杜陵更酸  
辛窮眼眩珠翠旨哉茲日遊超然遺塵累消遙千載後  
尚有浴沂意巖扉滑如玉歲月可鐫識

答李泉州元善

平生陳無已白首欠吟債未嘗交馬呂况曾見章蔡附  
熱生可鄙中寒死亦快吾方尚此友巾車與同載前瞻  
有膺滂却顧有融泰要當堅一壁詎可立兩界恕乎行  
誼虧希也名節壞史君惠良箴下走敢不拜懷哉道義  
交異彼姑息愛

明皇按樂圖

鶯啼花開春晝遲掖庭無事方遨嬉廣平策免曲江去

十郎談笑居台司屏間無逸不復覩教雞能鬪馬能舞  
戲呼寧哥吹玉笛催喚花奴打羯鼓南衙羣臣朝見疎  
老伶巨璫前後趨阿瞞半醉倚玉座袖有曲譜無諫書  
金盆皇孫真龍種浴罷六宮競圍擁惜哉傍有錦綳兒  
蹴破咸秦跳河隴古來治亂本無常東封未了西幸忙  
輦邊貴人亦何罪禍胎似在偃月堂今人不識前朝事  
但見斷縑粧束異豈知當日亂離人說著開元總垂淚

築城行

萬夫喧喧不停杵杵聲丁丁驚后土徧村開田起窯竈  
望青斫木作樓櫓天寒日短工役急白棒訶責如風雨  
漢家丞相方憂邊築城功高除美官舊時廣野無城處  
而今烽火列屯戍君不見高城齧齧如魚鱗城中蕭疎  
空無人

運糧行

極邊官軍守戰場次邊丁壯俱運糧縣符旁午催調發  
大車小車聲軋軋霜寒晷短路又滑擔夫肩穿牛蹄脫

嗚呼漢軍何日屯渭濱營中子弟皆耕人

和南塘食荔歎

君欲和詩無怱怱唱首天下文章公今年荔子況倍熟  
亭亭錦蓋高張空猿偷鴉啄牧童采林間殘顆猶殷紅  
在昔唐家充歲貢吟諷何止杜陵翁南窮交州西蜀土  
快馬馱送如飛龍絳裳冰肌初照眼玉環一笑恩光濃  
惟聞以遠幸免澁一顆不到溫泉宮自從陳紫無真本  
皺玉晚出尤稱雄邇來難舌擅瑰瑋贊香譽味萬喙同

麟臺仙人親題品天為此果開遭逢乃知微物似有數  
聲價亦與時汗隆列聖儉德被華戎微如淮白不敢供  
奈何置驛奉私室安得木鐸觀民風山蹊谷塹日力窮  
血肩踠足馳筠籠請公移此食荔歎置在薰風殿閣中  
宿莊家

茆茨迷詰曲度谷復踰陂世上事如許山中人不知牛  
羊晴卧野鵝驚晚歸池粗識為農意秋輸每及時

夜過瑞香庵作

夜深捫絕頂童子旋開扉問客來何暮云僧去未歸山  
空聞瀑瀉林黑見螢飛此境惟予愛他人到想稀

贈川郭

川郭顛狂甚平生挾術遊老猶攜侍女貧不諂公侯用  
藥多投病酬錢或掉頭金陵官酒貴應典舊貂裘

送鄒景仁

衝寒何處去新戍尚來年客勸休辭幕君言已買船霜  
清江有蟹葉脫木無蟬若過東林寺攜家往問禪

二將石侯韓仔

二將同時死路人聞亦哀力窮塵轉急圍厚突難開戰  
骨尋應在殘兵間有迴傷心郵遞裏隔日捷書來

穴蟻

穴蟻能防患常于未雨移聚如營洛日散似去邠時繼  
續緣高壁周遭避淺池誰為謀國者見事反傷遲

野性

野性無羈束人間毀譽輕客言詩卷謗妻諫酒傷生窓



納鄰峰碧瓢分遠澗清近來尤少睡打坐到鐘聲

全州

寂寂全州路家家荻竹扉異僧留塔在過客入城稀傳  
舍臨清泚官亭占翠微沙頭泊船者多自嶺南歸

贈高九萬并寄孫季蕃

諸人凋落盡高叟亦中年行世有千首買山無一錢紫  
髯長拂地白眼冷看天古道微如綫吾儕各勉旃

贈翁卷

非止擅唐風尤于選體工有時千載事祇在一聯中世  
自輕前輩天猶活此翁江湖不相見纔見又西東

哭李景溫架閣

挾策說荊州那知亦閣投漫招溫處士幾殺杜參謀出

幕有清議還鄉空白頭人間容不得下與阿翁遊

建寧丞相

其祖也

送趙叔愚赴潯州理掾

未奉三雍對聊為五筦行鄉書踰嶺少詩思入湘清遠

宦身差穩中州事日生向來幾離別此別最關情

白鶴故居

天稔中原禍朝分黨部爭當年誰宰相此地著先生故  
國難歸去新巢甫落成如何鯨浸外更遣打包行

唐博士祠

博士位尤卑投名入黨碑今觀名世作多在謫官時太  
史沅湘筆儀曹永柳詩新祠綿蕞爾未盡復遺基

送陳霆之官連州

地接湖南境孤城若箇邊  
茆寮愁問宿峽石善驚船  
官小無迎吏詩工有續編  
古人高妙處不過覽山川

張麗華墓

臺上栢蕭蕭空堂閉寂寥  
芳魂三尺土往事幾迴潮  
墮翠尋難見埋紅恨未銷  
猶勝江令在白首入隋朝

勝業寺

寺創于何代問僧皆不知  
槎牙夏后栢殘缺柳侯碑  
雪過禪堂冷冰餘嶽路危  
上封猶未到太息負心期

嚴關新洞

羽客初尋見，因于此葺廬。未能平險峻，先擬架空虛。磴路樵相引，山名尉自書。看來臨驛道，未必有仙居。

送范守仲治

放逐諳時態，惟侯意味長。醴為狂客設，羹許老人嘗。南國留棠舍，西郊閉草堂。臨岐先作惡，未可倚剛腸。

早行

店媪明燈送，前村認未真。山頭雲似雪，陌上樹如人。漸

覺高星少纔分遠燒新寧須看堠子來往暗知津

近

杜于皇藩有早行一首可敵是作其詩云早發柘皋鎮  
出門疑五更池光先作曉山路幾時平後騎風相逐前  
人影漸明翻愁羣  
動起亂我百蟲聲

### 暝色

暝色千村靜遙峰帶淺霞荷鋤歸別墅乞火到鄰家  
戍鼓聞更遠昏燈見字斜小軒風露冷自起灌蘭花

### 郭璞墓

先生精數學卜穴未應疎因捋虎鬚死還尋魚腹居如

何師鬼谷却去友靈胥此理憑誰說人方寶葬書

堯廟

帝與天同大天存帝亦存桑麻通絕徼簫鼓出深村水  
至孤亭合山居列岫尊尚餘土階意樵牧踐籬藩

客中

漂泊何須遠離鄉即旅人炊薪嘗海品書刺謁田鄰婦  
寄寒衣少山來曉夢頻小兒仍病瘡詩句竟無神

別教器之

名陶孫即題  
詩三元樓者

舊說閩人苦節稀先生獨抱歲寒姿老年絳帳聊開講  
當日烏臺要勘詩東閣不遊緣有氣草堂未架為無貲  
輕煙小雪孤行路折牘梅花寄一枝

老歎

肘後奇書懶更開只今年鬢已相催但聞方士騰空去  
不見童男入海迴無藥能留炎帝在有人曾哭老聃來  
醉鄉一路差堪向終擬劉伶冢畔埋

答友生



讀易叅禪事事奇  
高情已恨挂冠遲  
清于楚客滋蘭日  
貧似唐人乞米時  
家為買琴添舊債  
厨因養鶴減晨炊  
君看江表英雄傳  
何似孤山一卷詩

小村人家

生來拙性嗜清幽  
因過山家為小留  
頂笠兒歸行樹杪  
提瓶婦去汲溪頭  
參天老竹當門碧  
盡日寒泉遶舍流  
我料草堂猶未架  
規模已被野人偷

瓜洲城

先朝築此要防邊不遣邊兒見戰船遮斷難傳河朔檄  
修來大費水衡錢書生空抱聞雞志故老能言飲馬年  
慚愧戍兵身手健箔樓各占一間眠

### 新亭

此是晉人遊集處當時風景與今同不干鐵鎖樓船力  
似是蒲葵塵柄功幾簇旌旗秋色裏百年陵闕淚痕中  
興亡畢竟緣何事專罪清談恐未公

### 送周監門

一領青衫似敗荷，奈何君母老秩卑。何三年幕府無人薦，  
常日柴門有客過。身畔擔輕藏俸少，江頭船重載書多。  
故人若問軍中事，為說防秋夜枕戈。

戲孫季蕃

少日逢春一味癡，輕鞭小袖趁芳時。常過茶邸租船出，  
或在禪林借枕欹。名妓難呼多占定，好花易落況開遲。  
身今憔悴投空谷，悔不當年秉燭嬉。

紫澤觀

修持盡是女黃冠自小辭家學住山簾影靜垂斜日裏  
磬聲徐出落花間祭星綠簡親書字避客青衣密拚關  
最愛粉牆堪試筆苦無才思又空還

方寺丞新第

一生不蓄買田錢華屋何心亦偶然客至多逢僧在坐  
釣歸惟許鶴隨船按行花木皆僚友主掌湖山即事權  
京洛貴人金谷裏安知世上有林泉

方寺丞艇子初成

船成莫厭野人過久欲從公具釣蓑積雨晴來湖面濶  
殘花落盡樹陰多新營小店皆依柳舊有危亭尚隔荷  
所恨前峰含暝色不然和月宿煙波

燈夕

千炬金梔映玉渠臺城昨夢又年餘斷無絃索鳴華屋  
惟見炊煙起草廬兒報瓶空因止酒婢言油盡暫停書  
蓬窻亦有精勤士何必然藜向石渠

觀元祐黨籍碑

嶺外瘴魂多不返  
冢中枯骨亦加刑  
稍寬末後因奎宿  
暫仆中間得彗星  
蚤日大程知反覆  
莫年小范要調停  
書生幾點殘碑淚  
一弔諸賢地下靈

募兵

調發年多籍半空  
虎符招補至閩中  
莊農戎服來操戟  
太守儒裝學挽弓  
去日初辭鄉樹綠  
到時愁見戍旗紅  
募金莫作纏頭費  
留製衣袍禦北風

書事

人道山東入職方書生膽小慮空長遺民似蟻饑難給  
俠士如鷹飽易颺未見馳車修寢廟先聞鑄印拜侯王  
青齊父老應流涕何日鸞旗駐路旁

身在

身在樵村釣瀨行秋毫不與市朝爭目云嗜酒相繩急  
謗到吟詩所犯輕沉水一銖銷永晝蠹書數葉伴殘更  
閉門孤學無窮味笑殺韓公接後生

感昔二首

談攻說守漫多端誰把先朝事細看棄夏西陲忘險要  
失燕北面受風寒傍無公議扶种李中有流言沮范韓  
寄語深衣揮麈者身經目擊始知難

先皇立國用文儒奇士多為筆墨拘澶水歸來邊奏少  
熙河捷外戰功無生前上亦知彊至死後人方誅尹洙  
螻蟻小臣孤憤意夜窻和淚看輿圖

得曾景建書

聞君別後買傾城酒戒中年亦放行遠使忽來知病起



近書全未說丹成莫嫌身去依劉表曾有人甘殺禰衡  
何日斷原荒澗畔一間茅屋對寒檠

被酒

酒戶當年頗著聲可堪病起困飛觥醉呼褚令為傖父  
狂喚桓公作老兵舊有崢嶸皆鏟去新無磊塊可澆平  
投牀懶取騷經看只喚梨花解宿醒

贈徐相師

許負遺書果是非子憑何處說精微使君豈必如椰大

丞相元來要瓠肥袖潤日常籠短刺肩寒春未換單衣  
半頭布袋挑詩卷也道遊方賣術歸

哭黃直卿寺丞

當年出塞共臨戎箭滿行營戍火紅督府凱旋先請去  
堅城築就獨無功身謀彼此皆迂濶國事中間偶異同  
莫怪些詞含哽噎在時曾賞小詩工

崇化麻沙道中

經行愛此人煙好面俯清溪背負山半艇何妨呼渡去

小橋不礙負薪還遠聞清磬來林杪忽有朱欄出竹間  
深處安知無隱者卜鄰容我設柴關

真隱寺

出郭斜陽已在山夜深乘月到江干奴敲小店牢扃戶  
僧借虛堂徑挂單駭浪急回因膽薄逆風小住為心寬  
投牀一枕瀟湘夢無奈霜鐘苦喚殘

挽方孚若寺丞

使君神雋似龍麟行地飛空不可馴詩裏得朋卿與我

酒邊爭霸世無人寶釵去盡中年病珠履來疎晚節貧  
昔共誅茅聽瀑處溪雲谷月亦悲辛

為圃

衰病歸來占把茅譬如僧葺退居寮因存橘樹斜通徑  
怕礙荷花小著橋古有功名興釣築今無物色到漁樵  
可憐歲晚閒雙手種罷蕪菁擷菊苗

寒食清明

寂寂柴門村落裏也教挿柳記年華禁煙不到粵人國

上冢亦攜龐老家漢寢唐陵無麥飯山蹊野徑有梨花  
一尊徑藉青苔卧莫管城頭奏暮笳

題趙子固詩卷

紫芝仲白俱仙去晚秀惟君擅士林字肖率更新手作  
詩疑賈島後身吟九成合奏音方備三染為纁色始深  
老去尤于朋友篤未忘几研琢磨心

送王實之

邁

欲去還留每自憐竟為吾子著先鞭孤忠盡見萬言疏

十口同登一葉船  
屈法相傳煩聖主  
上書俱貶愧前賢  
南歸定過西山下  
細把行藏告墓阡

寄徐真翁侍郎

憶昨紛紛衆喙鳴  
怪君噤斷久無聲  
得非家客留廷尉  
或是閨人沮仲卿  
白璧微瑕終古在  
黃金橫帶霎時榮  
從來公議無情甚  
莫遣蒙齋獨擅名

次韻實之

孤臣去國四經春  
跡遠安知罪尚新  
蚤亦曾譏秦氏者

纔為與議濮園人懶箋光範千時宰且伴田家賽社神  
醉倒不能愁世事倩他煙柳替含顰

題小室二首

已向深林卓小庵是中僅可著禪龕  
士師何止三無愠  
中散居然七不堪一去重華那復得  
方當盛漢勿多談  
近來弟子俱行脚誰伴山僧面壁叅

阡陌東西山北南半生常帶散人銜  
何曾雲夢芥八九  
一任狙公芋四三閣上大夫投欲死  
甕間吏部寢方酣

可憐子駿無家法下見先人面有慚

送表弟方時父

棄置空村飽世情高軒乃肯顧柴荆韓甥殷浩貧親戚  
李益盧綸外弟兄兩鬢蕭疎驚老大一燈明滅話平生  
刺桐花下逢予季多致詩人未害清

夢方孚若

寤寐中原獨著鞭往來絕域幾餐氈封侯反出李蔡下  
成佛却居靈運先八百里烹饗軍餒九千緇輦作碑錢



祇今誰是田橫客回首荒丘一慨然

寄趙昌父

世上久無遺逸禮此翁白首不彈冠  
一生官職監南嶽四海詩名主玉山  
經歲著書人少見有時入郭俗爭看  
何由樵服供薪水得附高名野史間

按章泉詩苦不多即今所傳亦

無奇句而一時名人慕悅如此則以其志趣超然為難及耳

雪

衰同梧葉報蕭颺卧聽窻聲作許愁  
繁暗冷光侵研几

瓦疎飛片落香篝病思結客遊梁苑狂愛提軍入蔡州  
也待訪梅湖畔去黃塵滿袖欲盟鷗

遇雨

與客同登萬仞崖蔽天風雨驀然來六丁白晝誅炎魃  
百怪蒼淵起蟄雷毒蟒噴時林盡黑怒龍裂處石中開  
吾生不及觀河決得賦斯遊亦壯哉

漁梁

春泥滑滑雨絲絲一路陰寒少霽時水入陂渠喧似瀑

雲從山崦上如炊燎衣去傍田家火炙燭來看野店詩  
落盡梅花心事惡獨搔蓬鬢繞殘枝

鄭寧示邊報走筆戲贈

曾客嫖姚與伏波慣騎生馬擁琱戈金臺有命終須築  
鐵硯無功亦且磨見說帛書來汝洛又傳氊帳迫淮河  
只今西北多機會吾子南歸竟若何

醴陵客店

野郭依稀隔渡頭解鞍來倚店家樓欲攀桂樹吟招隱

因看梅花賦遠遊市上俚音多楚語橋邊碧色是湘流  
直南鄉國幾千里目送羈鴻起暮愁

落梅

二首

一片能教一斷腸可堪平砌更堆牆飄如遷客來過嶺  
墜似騷人去赴湘亂點莓苔多莫數偶粘衣袖久仍香  
東風謬掌花權柄却忌孤高不主張

按君以末二語  
竟遺詩襖所謂

却被梅花累十  
年真堪一笑也

昨夜尖風幾陣寒心知清物久留難枝疎似被金刀剪

片細疑經玉杵殘痛叱山童持帚去苛留野客坐苔看  
月中徙倚憑空樹也勝吳兒賞牡丹

老馬

脊瘡蹄蹇瘦闌干火印年深字已漫野澗有冰朝洗怯  
破坊無壁夜嘶寒身同退卒支殘料眼見新駒鞮寶鞍  
昔走塞垣如抹電安知末路出門難

老妓

籍中歌舞昔馳聲顚顚猶存態與情愛說舊官當日寵

偏呼狎客小時名薄鬟已脫梳難就半被常空睡不成  
却羨鄰姬門戶熱隔牆張燭到天明

老奴

少賤腸枵破褐單傍人門戶活饑寒自從毀齒初成券  
直至長鬚尚不冠冷炙時霑筵上餽禿芒旋掃臼邊殘  
他時縱取封侯印僅得君王踞廁看

老妾

傷春感舊似中醒樂器全拋曲譜生自少抱衾無怨色

閒時擁髻尚風情曾陪太尉斟還唱猶記司空眼與聲  
著主衣裳為主壽莫如琴客別宜城

丙辰元日

免隨賀旦赴南衙五見空村換歲華旋遣厨人挑薺菜  
虛勞座客頌椒花不施行馬均編戶雖飲屠蘓殿一家  
二十宦遊今七十却于身外復何加

宿千歲庵聽泉

因愛庵前一脉泉襟袞來此借房眠驟聞將謂溪當戶

久聽翻疑屋是船  
變作怒聲猶壯烈  
滴成細點更清圓  
君看昔日蘭亭帖  
亦把湍流替管絃

南浦亭寄所思

只是從前瘦病身  
官卑活計太清貧  
買來晉帖多成贗  
吟得唐詩轉逼真  
生擬棄家尋劍客  
死當移家近騷人  
秋風爛熳吹雙鬢  
目送停雲欲愴神

烏石山

客子家山亦此峰  
可堪投宿聽疎鐘  
旋沽村酒開霜柿



欲訪禪扉隔暮松鄉信寫成無便寄寒衣著綻倩人縫  
遠來只為營瓜圃不是貪渠萬戶封

鳳凰臺晚眺

經月疎行臺上路秣陵城郭忽秋風馬嘶衛霍空營裏  
螢起齊梁廢苑中野寺舊曾開玉帳翠華久不幸離宮  
小儒記得隆興事閒對山僧說魏公

去春

去春烽火照江邊曾草軍書夕廢眠萬里旌旗真屬命

一丘耕釣且隨緣偶然謝客原非病間亦尋僧不為禪  
尚有惜花情味在銅瓶終日玩芳妍

送李用之察院赴潮州

烏府名臣暫擁麾霜稜聊復變春熙行人猶謂驄當避  
聖世初無鱷可移粵俗相攜看上日韓祠配食付他時  
極知不作周南滯禁闥須君補闕遺

訪李鋼草堂不遇

細路縈紆入野田遙瞻竹樹已欣然青苔地滑跌盧老

蒼耳林深迷謫仙不羨玉堂在天上徑須茆屋占雲邊  
極知謝客非為亢貪看林花聽澗泉

西山

絕頂遙知有隱君餐芝種朮鹿為羣多應午竈茶煙起  
山下看來是白雲

歸至武陽渡作

夾岸盲風掃棟花高城已近被雲遮遮時留取城西塔  
篷底歸人要認家

再贈錢道人

拙貌慚君仔細看  
鏡中我自覺神寒  
直從杜甫編排起  
幾箇吟人作大官

久旱即事

二首

賜烏下飲百川空  
民自祠龍禱社公  
豈是長官渾忘却  
水車聲不到城中

輸租常占一村先  
不望明時舉力田  
老畏里胥如畏虎  
敗人詩思攪人眠

湘潭道中即事

儼鼓鼕鼕匝廟門可憐楚俗至今存  
屈原章句無人誦別有山歌侑桂尊

出城二絕

日日銅瓶插數枝瓶空頗訝折來稀  
出城忽見櫻桃熟始信無花可買歸

小憩城西賣酒家綠陰深處有啼鴉  
主人嘆息官來晚謝了酴醾一架花

病後訪梅 二首

夢得因桃數左遷長源為柳忤當權幸然不識桃兼柳  
却被梅花累十年

和靖林間欬嗽時一邊覓句一邊饑而今始會天公意  
不惜功名只惜詩

羅湖

異境微茫在半霄僊人垂手下相招老來尚有君親念  
未敢相陪過鐵橋

扶胥

一陣東風掃曉霾  
天容海色豁然開  
何須更網珊瑚樹  
祇讀韓碑也合來

再題六如亭

昔人喜說墜樓姬  
前輩尤高斷臂妃  
冑伴主君來過嶺  
不妨扶起六如碑

宮詞 二首

涼殿吹笙露滿天  
木犀花發月初圓  
君王少御珊瑚枕


多就宮人玉臂眠

先帝宮人總道粧  
遙瞻靈栢淚成行  
舊恩恰似薔薇水  
滴在羅衣到死香

書壁

綠衣蒲屨小綸巾  
四壁清風一榻塵  
誰謂先生貧到骨  
百金新聘竹夫人





宋元詩會卷四十八

欽定四庫全書

集部

宋元詩會卷

四十九  
五十九

詳校官中書<sub>臣</sub>陸 湘

主事銜<sub>臣</sub>徐以坤覆勘

總校官知縣<sub>臣</sub>繆 琪

校對官中書<sub>臣</sub>牛稔文

謄錄貢生<sub>臣</sub>齊兆求

欽定四庫全書

宋元詩會卷四十九

兵部主事陳焯編

徐經孫

字中立寶慶二年進士授潤陽主簿知臨武縣通判潭州權監察御史劾京尹勵文翁不報即日出都上遣使追之不及進直寶章閣提刑福建升安撫召為祕監歷宗正刑侍兼給事升太子詹事輔導東宮三年拜翰林學士知制誥忤丞相賈似道罷歸十年卒贈光祿大夫

和黎丞梅關嶺

峭壁接高天，閒雲淡橫嶺。稍便僧房靜，未覺官曹冷。風月兩閒人，山川一佳境。誰歟共茲樂，老仙白垂領。

題施山觀音閣

閣道連雲棧，簷牙覆竹陰。南來天馬渡，北落水龍吟。林鳥疑談偈，田花欲布金。凭欄觀下界，洞見遠公心。

病中有感

習懶多成病，旬餘久覆杯。帳中聞燕語，瓶裏看花開。醫已肱三折，愁來腸九迴。何時得疎散，屐齒印蒼苔。

福州即景

一別居諸歲月增遙聞此景畫難能  
潮田種稻重收穀道路逢人半是僧  
城裏三山千簇寺夜間雙塔百枝燈  
常年六月東崖下地湧寒泉漱齒冰

送仲時弟

江關千里隔山川有弟能來慰眼前  
方喜雁行隨處樂可堪蟾影別時圓  
暑行勿亟宜彊飯湍激多驚莫問船  
歸到家山相勞苦團樂恰是菊花天

# 方岳

字巨山歙人紹定間進士官至吏部侍郎前後為權相所惡擯斥以死有秋崖集 裨史云方巨山昔在趙丞相幕中因避趙父之諱改姓為萬後又為丘岳屬官改名曰萬山恐未必然

## 燕來巢

吾貧自無家客戶寄村疇槿籬只三間荒寒天不管燕亦何所聞乃于我乎館豈以菊未莎而有竹可款不叩富兒門寧為老夫伴此意殊可人然亦似吾懶所須半九泥不費一秉耜云胡及風熏相宅無乃緩勉哉爾翁

姥坐席寧暇暖主人當賀成落以晴雲盃

塾室

室中度以几其脩去尋一廣長半而羸崇爲咫者七牖  
一以爲明瑾三以爲密不供並橫肱所貴劣容膝蠖屈  
忘春霆龜穹美朝日玄冥方用事萬木僵欲慄窮陰易  
中人戒子謹無出于時則然耳天者儻可必相爾室外  
寒磚爐坐捫蝨

東西船

昨日東船送風下突過乘興快于馬今日西船使風上  
適從何來急于浪東船下時西船怨西船上時東船羨  
篙師勞苦自相寬明日那知風不轉推篷一笑奚爾爲  
怨遲羨速無休時沙頭漠漠杏花雨依舊年時櫓燕語

豆苗

江南之筍天下奇春風怱怱催上籬秦郵之薑肥勝肉  
遠莫致之長負腹先生一鉢同僧居別有方法供齋蔬  
山房掃地布豆粒不煩勤荷煙中鉏手分瀑泉洒作雨



覆以老瓦如穹廬平明發視玉髯磔一夜怒長堪冰苴  
自親火候淪魚眼帶生毫入晴雲盃碧絲高壓涎滑尊  
脆響平欺宰螯焯晚菰早韭各一時非時不到詩人脾  
何如此雋咄嗟辦庾郎處貧未爲慣

黃宰致江西詩雙井茶

黃侯授我以江西詩禪之宗派淪我以雙井老仙之雪  
香磚爐春著兔毫玉石鼎月翻魚眼湯夜窓搜攬十年  
讀候蟲鳴秋聲殷牆廼翁詩家第一祖不用捧喝行諸

方掀翻杜陵自作古夜半衣鉢誰升堂單傳橫出三十  
六未許歛梅洪雁行雅聞滕閣藏墨本欲往從之山阻  
長牙箋大冊忽在眼荒苔茆屋森珩璜東湖柳色入眉  
宇君其幾代之諸郎不離文字話祖意傳燈肯與留山  
房寧知三生受昏闇縱有此燈無此光宜州戍樓山月  
苦茫茫參到無何鄉

黃宰當是山谷之孫  
而逸其名字何也

齋中

竹外一燈青殘書伴古廳葉乾聞雨急山近覺嵐腥多

病身爲累無心夢亦靈明朝有癡事須到采芹亭

山居 二首

我愛山居好林梢一片晴野煙禽諳語春水柳閒情  
石隨行枕藤花醒酒羹吾詩不堪煮亦足了吾生

我愛山居好紅稠處處花雲粘居士屨藤覆野人家  
入饌春燒筍分燈夜作茶無人共襟抱煙雨話桑麻

不寐

不寐何爲者幽居事更稠怯風思鶴冷聞雨爲花愁  
草

合妨遊屐沙崩壓釣舟春蓑故無恙歌枕數更籌

寄姪

爾亦爲貧驅窻間硯欲枯自從村野別曾到峽山無寒  
圃應肥菜秋霖怕損租有書供夜讀時一喚吾雛

舟次嚴陵

與雁分洲宿連雲做夢清江風月事老野雨客心驚潮  
急仍吞瀨更寒不過城子陵吾所避蓑外底須名

熱甚有懷山間

終是山間別寒泉在脚邊戲魚爭美蔭啼鳥破佳眠境  
寂夜如水僧閒日抵年欲來來未得庠斗救枯田

聽雨

竹齋眠聽雨夢裏長青苔門寂山相對身閒鳥不猜客  
應嫌酒盡花却爲詩開莫下簾尤好恐妨雲往來

泊歙浦

此路難爲別丹楓似去年人行秋色裏雁落客愁邊霜  
月歌寒渚江聲驚夜船孤城吹角處獨立渺風煙

秋曉登山

登興在丘林其如老見尋身餘持蟹手脚負看山心秋  
色蒼厓暝曉籬黃葉深唯應負苓者來往古松陰

道中連雨

蚤晏逢人問荒村店亦稀竹輿穿雨過沙鳥帶雲飛野  
渡疑無樹春山儘有薇不緣詩是伴誰與倚荆扉

山墅

且莫嫌窮僻山居儘自奇候樵分玉蕈熏穴得香狸杯

雋明冰片崖寒孕雪芝不遺吾一美慙爾野人爲

趙尉催築秋崖

只爾三間屋吾貧未易云與山先定謚有客屢移文竹  
喜今年活梅從隔塢聞猶嫌灌園力多爲讀書分

送王尉歸覲

喜有吟詩癖吾儕得往還客惟依竹語官只似僧閒夜  
雨燈誰共秋崖藁未刪柴門黃葉下別後正須關

答趙玉汝

人間無處不風波  
潮打西興雨一蓑  
難與命爭俱老矣  
徑尋詩去奈吾何  
園成次第自花艸  
山是知聞空薜蘿  
賴有月明千里共  
煙寒數筆落行窩

次韻鄭總幹

底須咄咄漫書空  
未覺人間欠此翁  
黃犢自隨諳寂寞  
青山亦諱話窮通  
世方怒及水中蟹  
我亦冥如天外鴻  
醉眼不知人幾品  
久將樵牧等三公

書戴式之詩卷



石屏遊諸老間蚤得詩名及諸老凋謝獨石屏歸然  
魯靈光耳予生後三十二年纔此一識秋風別去因  
書數語集中

七十行年戴石屏同時諸老各凋零扁舟歸去自漁舍  
冷骨秋來更鶴形天地無情頭盡白江山有分眼終青  
剡溪定有人乘興月下柴門不用扃

感懷

五首

異人曾授相牛經竒字初傳瘞鶴銘敲月不知僧某甲

鉏煙賴有老畦丁山靈呵護閒居賦象緯森羅處士星  
俯仰中心無愧怍芋區瓜隴亦朝廷

去國何年老一丘於今已換幾公侯不知我者謂爲拙  
是有命焉那用求舴艋舟應容釣蟹麒麟閣不畫騎牛  
百年長短身餘幾付與西風汗漫遊

從古幽閒在澗阿不將齒髮犯風波共知韓愈亦人耳  
予謂伯寮如命何野處生成盤谷序襟期寫在醉時歌  
尚嫌山淺人知處更與移牀入薜蘿

挂上風煙更一層  
瘦藤對倚玉峻嶒  
左花右竹自昭穆  
春鶴秋猿相友朋  
五畝園爲終老計  
半間雲住在家僧  
蹲鴟生乳菰如臂  
莫道山翁百不能

曩昔行藏已熟籌  
最爲上策是無求  
看人面孔有何好  
如此頭顱只合休  
草草園廬山北住  
匆匆歲月水東流  
莫因一片梧桐葉  
瘦損能詩沈隱侯

### 山居

春溪甘滑漱山瓢  
歸卧藤陰薜逕遙  
雲氣釀成巫峽雨

松聲寒似浙江潮書生與世例迂濶山意向人殊寂寥  
却喜庾郎貧到骨悲畦時一摘煙苗

次韻鄭僉判

不論山北與山南是處移將竹兩三亦愛村深工部屋  
尚嫌門對相公潭夕陽歸鳥占花塢山雨飯牛規草庵  
日挂壁從生白醖此中除酒百無堪

陪吳總侍集研山用趙端明送行韻

煙波畫出暮江天著我蘆花明月船官滿只稱前進士

路貧休問小行年一歸已後陶元亮衆論寧無班孟堅  
不負登臨重九約過江猶及菊花前

立春

初信東風入綵幡自挑雪齋飮春盤土牛又送一年老  
海鶴不知三逕寒筋力尚堪耕綠野鬢毛併欲挂黃冠  
無人共跨南山犢更作尋花問柳看

次韻徐宰集珠溪

僧不須敲飯後鐘自攜茶去借松風斬新山色佛頭綠

依舊桃花人面紅  
春甕貯冰搖玉螳  
夜堂烘蠟綴釵蟲  
山靈共欲留人住  
新月隔溪煙霧濛

過北固山下舊居

池塘燕子舊人家  
楊柳春寒一逕斜  
夜讀自生書帶草  
朝饑曾對米囊花  
侯誰在矣山如昨  
今我來思鬢已華  
舍館不知何日定  
竹輿鳴雨又伊啞

春日雜興 二首

高下雲藏野老家  
縱橫水漱竹籬斜  
勒將春去許多雨

流出山來都是花  
白首風煙三逕草  
清時鼓吹一池蛙  
身閒不耐閒  
雙手洗甌炊香夜作茶

南岡北嶺對窓扉  
看盡朝嵐與夕霏  
社後未曾聞燕語  
雨中誰不惜花飛  
山醅約莫幾時熟  
沙筍輪囷一尺圍  
莫怨風光損桃李  
荼蘼芍藥又芳菲

約黃成之觀瓊花予不及從以詩代簡

杜宇聲中鬢欲華  
春風將綠又天涯  
欠隨江夏無雙士  
共看揚州第一花  
想像煙雲人跨鶴  
淋漓詩句字栖鴉

寒驢不管唐衫溼醉兀歸鞍暮雨斜

夏日簡王尉

松蘿爲屋芰荷衣只與鳬鷗共釣磯  
雌霓橫溪遮雨斷雄風吹霧作塵飛  
山林誰可閒來往世俗難論真是非  
頗喜雪舟王逸少夜涼吾欲扣齋扉

山中

剌斲荒寒地百弓儘供弄月與吟風  
太平世界豐登外小有洞天閒適中  
野服染成駝樣褐山花開到雁來紅



夕陽籬落誰呼喚  
盃酒蹄肩賽社翁

旅思

索米長安鬢易絲  
向來書劍亦奚爲  
無詩傳與雞林去  
有賦羞令狗監知  
兩戒山河饒虎落  
五湖煙水欠鴟夷  
喜無光範三書草  
此段差彊韓退之

湖上

老藤支我步湖湄  
借與晴光一欠伸  
楊柳得春青眼舊  
山巒留雪白頭新  
鐵琅璫語尋齋鉢  
銀鱖刺肥收釣緡

有兩黃冠共棋局相攜便作所歡人

簡李桐廬

愧面何堪見客星移舟且莫近前汀  
鷗沙草長連江暗蟹舍潮回帶雨腥  
歸去尚餘初繭栗生來能費幾苓筍  
詩腸一夜生芒角試問故人雙玉鉶

逢梅二首

水仙婉弱山礬冗我自視之兒女曹魯直徑令相伯仲  
至今未敢廣離騷

人言草沒孤山冢從此梅花不要詩却是未嫌吾輩在  
一枝開過竹巴籬

### 岳珂

字肅之相州人宋南渡後家江州甘棠湖考其詩  
所自述蓋忠武裔也嘉熙戊戌官戶部侍郎總餉  
沔鄂史無傳於他傳見之言其制置當塗橫斂百  
出非廉士也

### 將發琵琶亭

前歲西渾鄂今歲東入吳同一琵琶亭行客各異塗當  
時白傅恨陳跡久榛蕪突兀眼前屋丹堊櫨廢興

曾幾時傳舍同遽廬已見兩折柳于此餞老夫昔持使者節今發追鋒車我則齊出處世自分榮枯而況天地間萬變同須臾我觀商婦者瑣瑣豈足書琵琶本常技何地無此徒夫販浮梁茶婦即空舟居長吏溼青衫禮法毋乃疎樂天子牟心一念存江湖詎關蝦蟆陵維以懷故都譬之澤畔吟此語非寓歟蓋嘗考遺集一事曾同符聞歌鸚鵡洲尋聲得幼姝倚櫓泣明月清淚垂真珠夫君當此時正屬典午初不應奇謫後無復思廉隅

六義有比興觀洵傳洵託物皆一理實事那相須人  
情伏與妬所值分賢愚低眉終不說正恥悻悻俱初意  
祇如此膠柱何足拘予折武昌柳予宅潯陽廬二詩端  
可識一笑聊洗誣

後元祐行上平章喬益公

正月二日天氣清六符兩兩三階平閤門催班報麻案  
珂馬玎玲萬人看押麻參政拆璽封宣詞舍人來殿東  
鞠躬一聲百僚聽軍國平章喬益公天心果與人心同

大哉聖斷天與通本朝太平說元祐五嶽三光渾未剖  
當年一日三制頒呂范堂堂分左右處中大老更魁傑  
申國勲名比韓富民生是時非漢唐親見至治躋義皇  
一塵不起四陲服軌順星躔蕃五穀士皆有造百姓寧  
官僚徹底清似冰析楊畢空戈革偃天街鏡淨無欃槍  
彼何人斯階啟厲九縣回飈八紘沸高皇匹馬開東南  
王業中興今五世窮荒極遠何自來中原萬里吹黃埃  
數彈剝復回否泰胚暉元氣鍾奇才耆明壽雋軼千古

呂望鷹揚稱尚父便教旦奭居東西穆穆迓衡今再覩  
官家即日開天章貂冠玉佩遊巖廊一都一俞一吁咈  
四海春風已披拂聖賢自昔難相逢巨魚縱壑鴻遇風  
輿人觀呼爭誦說元祐嘉熙莫分別君不見徂徠處士  
歌一夔濃墨大字慶歷詩生民至今受其賜千載萬載  
生光輝

按宋史嘉熙三年喬行簡拜平章軍國重事  
封肅國公茲稱益公或係後來加封名號

### 赤壁

周郎二十四年少蓋世功名隨一燎親提三萬走曹瞞不

以敵勅恨兵少豫州失七已膽折一日目明驚二妙最  
憐黃蓋不知名吏士相從倚營嘯阿奴火攻本無策破  
竹自繇人不料貪降納侮理固宜泥淖華容幾盡勦古  
來行師有絕地毋乃重詒千古笑鏃湛縱是差可忍鼎  
峙詎關謀所召二喬春鎖何足言從此天光遂分耀我  
聞漢賊久染指奮毒搖牙噬江表八荒囊括豈復遺一  
蹙吳宮已爲沼當時乘勝下部騎考地當居楚南徼蒙  
衝逆鬪須上流揖寇那容越津要武昌霸基跬步耳肯



使國畿紛戟旄坡仙訪古特寓意橫槊雄姿誰與弔故  
將異地眩詞賦政恐因訛啟譏誚滄浪六月卷晴雪歷  
歷江山人物眇嵌空亂石今幾存彷彿棲巢尚驚鳥夜  
深刁斗聲四發星斗滿空羣籟悄便須喚起紫綺裘孤  
鶴南天楚江曉

長門怨

驚風不成雨行雲去無蹤妾生三十年著籍長門宮宮  
車輓輓春雷曉明星初熒綠雲擾增成丙舍爭迎鑾惟

有長門閉花鳥黃門開玉匙畫史圖蛾眉金鋪振瓊鑰玉  
秀生銅池朝陽纔回金屋在轉盼不堪人事改入宮已  
作鄭袖噓出塞那知延壽賣花殘鳥語頻長門春復春  
花鳥易驚老況復門內人東風動地夜來惡萬翠千紅  
繞簾幙莫熊自有匪石心肯顧班姬秋扇薄長門勿輕  
怨視此篋中扇白華兮綠衣自古兮有之

病虎行

長風吹谷白日暗曠野人稀雲黯澹狐狸嘯舞豺狼嗥

病虎妥尾行蓬蒿天寒泉凍山骨高皮枯髀痒霜爪搔  
紛紛晴雪爬落毛垂頭帖耳身腥臊羣鴉搓牙噪古木  
燐火半青新鬼哭走麕過前不能逐目視眈眈蹲撲檉  
毛風血雨天地肅何日跳踉看食肉天生萬物有盛時  
當年一嘯天助威坐看雲起行引兒當塗寧復論老羆  
一朝老去守巖竇落葉滿山水雪後壯心空在筋力疲  
寂寞長饑眠白晝古來豪傑多沉淪不用爲鼠皆若人  
范睢折脅西入秦內史長歡田甲嗔可憐百獸爲披靡

轉顧不如園中承男兒奮跲亦渠似肯復虛爲倚崖死  
君不見南山白額曾報恩牆頭金枕投何人

三江口過舟時方四鼓

擢鷁收金柅釵蟲綴玉缸地隣今七澤名襲古三江岷  
漾雖分派荆揚却異邦晨光猶未發早認白鷗雙

荷花盛開以病旬餘不至亭上偶成

病襟慵策杖天鏡恰開奩青蓋迷前浦紅粧間曲櫺藻  
窺知鷺下萍破識魚潛會看吳公陣官蛙奏曉嚴

早起

五夜玉繩轉雙轡金井寒背人鮫作市欺夢蛩鳴官竹  
徑風初度松梢月尚團踞龜猶汗漫何許覓乘鸞

午睡

東日平明際北窗高卧時五經方坦腹百慮且伸眉蕉  
覆從疑鹿槐安更獵龜覺來還一莞七椀玉川詩

綿羊

躡毛吹朔雪細肋卧晴沙曉牧尾搖扇春遊項引車潼

流便逐草酪賦正需茶日夕歸棲處因風想塞笳

山中奉寄通判楊宗博

多病山中客無人傍酒樽與猿分橡子爲鹿長禾孫  
白晝雲歸屋黃昏雨打門忽懷楊別駕煙靄隔重閣

宿溪聲閣望香爐峰

閒歷煙巖古琮琤雪澗橫海潮秋八月山雨夜三更肯  
作隨流想難忘漱石情壯懷徒激烈聊復以詩鳴

庚子正月慧見于室有詔求言感作

美芹野人意喬木世臣家尺璧諒非寶寸心元不遐誰  
知劔門棧已建鬱軍牙所恨韶鈞遠難堪聽夕笳

排灣遇風對岸即彭澤舊縣

隱約山藏霧砢砢地起雷黑風吹海立白雨過江來齊  
樂正應爾沛兒安在哉雄雌誰與辨試上楚王臺

三塔寺寒光亭張于湖書詞寺柱吳毅夫命名後  
軒

竹裏逢僧院殘碑不記年鴈題三峯堵龍化兩魁躔寶

慶號應紀元豐墨尚鮮寒光定何似誰放五湖船

楊梅

泮歷三家市梅蜚萬顆酸瑤池看火樹樓室試金丹風  
露盈籃重冰霜透齒寒它楊應不類留與子雲看

張公洞

驢跡驚初踐鷹盤若有靈石橋通便戶金鑰鎖殊庭滴  
乳看成像登臺仍刻銘更憐團山寺真欲比云亭

春波堂小飲懷棠湖舊居



平生到處西湖長眼底波光日日新圖在輞川非舊隱  
夢回笠澤是前身一江細雨歌青菊萬里雄風起白蘋  
獨立蒼茫動歸興釣磯須理未垂綸

上巳約客病不及往二詩呈陳元履王因道諸君  
我是崇磯舊釣徒天教生與水雲俱蘭亭正值人修禊  
柳岸還添浪拍湖幸有丈人觀筆法可無嘉客醉兵厨  
直須去躍城東馬更與留春作後圖

予癸巳在京口因郡中元夕張燈偶閱國史靖康

丙午正月十五日辛巳祐陵南巡駐蹕是郡二  
月二十三日巳未始還京師凡居郡三十有八  
日茲聞簫鼓感舊興嘆不勝潜然因涉筆以記  
大略而僧有冲希者乃攜以示韓正倫彼謂予  
諷已遂架大怨迄興妄獄賴聖明察知其冤前  
謾盡白因悼正倫之歿閔其左計亮其初心附  
昔所作詩于後

駕輶老子久婆娑坐聽笙歌擁綺羅十里西涼憶如意

百年南國比流梭  
吞聲有恨哀蒲柳  
紀節無人廢蓼莪  
寂寞丹心耿梅月  
挑燈頻問夜如何

予歸未省松楸  
將以初秋望前汎湖之龍門已戒  
舟而值連雨因賦天問

小心風伯紫宮回  
眼看銀蟾海上來  
玄豹又成漫谷霧  
斷虹猶作隱山雷  
便教雨積三時害  
未信雲無一日開  
待試平生補天手  
爲君明鏡再安臺

賀李微之兼工侍

奎章夜下九重天  
雍乘疇咨法從賢  
紀雉重開五工正  
止麟還見一經傳  
紫荷佩袷新簪橐  
青汗磨鉛舊簡編  
便合史筵尊領袖  
紅雲堆裏望台躔

雨中觀廬山

雨裏觀山夏不同  
何須九疊看屏風  
紫觚壇上排蒼壁  
青步障邊鋪翠茸  
谷錦未迴晴日照  
衣綃聊借淡煙籠  
祇今萬木添紅纈  
更倩青霜染曉楓

太平興國宮

槐影西清舞翠鸞竹宮高接五雲環  
職陪溫洛圖書地名在元封卜祝間  
晝訪未承龍閣問晨香猶廁羽衣班  
祠官到處無公事且聽松聲老此山

將遊太平宮呈趙季茂

聖治峰前松檜寒舊遊重此解歸鞍  
著身泉石無心客主掌雲山正額官  
老去隱居紫府新來襍壓壓黃冠  
門東曾有劉仙洞剝蘚攜筇試扣看

聞畫眉鳥聲戲作

木杪幽禽巧語新  
何時曾記得名因樣傳京兆成雙嫵  
人指漁陽開小顰  
儘稱如簧啼白晝  
未須對鏡學青春  
山中有叟嗒無語  
短褐龐眉更笑人

以廬山所產天花輩冬筍玉延饌趙季茂通判

已認山家作富家  
與猿分栗雀分茶  
氣先十月地抽筍  
光現五臺天雨花  
幸有玉延炊夜月  
肯令繡谷嚙朝霞  
憑君試雋幽厓味  
却較閒忙定不差

設醮太平宮竣事呈偕行諸君

星壇仙籙韻瓊瑤彷彿神旂下九霄  
龍駕清都三境接  
蜺旌絳節百靈朝  
霜澄夜氣俱明徹  
雲澹秋容想沈寥  
耿耿寸衷天所鑒  
憂時惟冀五兵銷

己亥明禋覃恩封鄴侯感愧有作

布衣所願極封留  
佩印歸來正倦遊  
汗馬無功開上郡  
鑄龜有意顧中流  
南巡空負黃圖恨  
北望還興紫陌愁  
王國不煩謀主父  
自嘲支子亦通侯

詠小園雙竹

錦綉王立紀雙清瑞牒千年重得名  
龍竹高標儼元致  
熊湘素節凜皇英  
質同隴麥兩岐秀  
竒並庭柯連理榮  
却羨此君尤特立  
虛心直道不孤生

新荷出水

貼水初翻紫玉團  
忽驚矗立傍闌干  
瑤池七日來青鳥  
玉鑑孤奩舞翠鸞  
曉露走盤珠  
顆瑩晚風颺  
蓋雪衣寒  
從今十丈開花面  
太華峰頭更一看

白水浦懷王建寧



南朝舊見王忠武此地曾屯十萬兵十里荒蹊秋兔健  
千年陳迹暮鴻征無衣空蘊包胥志遺幘終留諸葛名  
落日英雄滿襟淚鳳凰倚徙正孤城

問道宜興

粹儀夾綻盛花鈿人說先朝祀玉仙  
罨畫有溪春不老煉丹無竈古空傳  
乞靈賸擬羞蘋藻養性何勞學汞鉛  
書閣蒼龍應不遠爲君重寫白雲篇

夢尚留三橋旅邸

天上歸來打六更夢回搔首正瞢騰玉霜初上三橋月  
絳綵猶明九市燈聲徹銅魚催勘箭影斜金鵲在觚稜  
帝鄉東望重回首佳氣何時到五陵

林希逸

號庸齋閩人端平間進士  
與劉克莊同年官至學士

冬曉

雲樹曉層層初霞照屋稜冰池紋似鏤霜瓦氣如蒸凍  
想歌樵客閒思煨芋僧癡翁吟太早窗下有殘燈

雨後溪橋看水

綠徧東西岸田家亦喜晴  
溪回急雨漲雲放半山明  
沙外看流勢橋邊聽淺聲  
向令平十里應與剡爭名

資福嶺庵前作

嶺路松陰好歸鞭爲小停  
苔封石面紫藤絡樹身青  
庵古無人住蟬多過客聽  
少時文會處近裏有祠庭

和後村口占

老去田翁多狎友年來觀主換新衙  
緣溪竹杖時行散

面壁蒲團漸放參，休夢筆花尋硯滴。  
祇看貝葉守燈龕，清朝越紉修祠禮。  
留滯何妨似史談。

和唐衣

苦著唐衣落魄多，人生行樂不知他。  
可曾癡說飛霞佩，那肯吟思疊雪羅。  
帶眼減多癯已甚，布毛吹盡意如何。  
溪隣更有笭箬伴，時整牛衣共緝莎。

春谷示榕橋精舍二十四詩和其首韻

春谷因榕費苦吟，爲憐夾道綠陰陰。  
身藏巖澗風霜老。

名入圖經歲月深北客未知題詠少南州莫向字書尋  
鶯啼庭葉曾留句獨賞河東刺史音

先母忌日 丁卯

兒正癡時賴母賢如今滿鏡白于綿  
可堪遠日思存日更向衰年憶幼年  
嫠早獨攜三稚子世貧能有幾硯田  
書燈督課無虛夕曾解衣還束脯錢

庾樓月夜

明月今宵好曾經照庾公登樓當靜夜  
懷古對秋風飛

鏡緣空上危簷映水中胡牀無恙否岸幘爲誰雄老子  
今何在寒光昔亦同清談孤此景白髮向江東

月

此夜一輪滿騷情不禁秋月非人可掃人與月俱愁素  
魄憑誰問寒光爲底留擬隨風葉去遠似雪花浮竹影  
搖仍在波光散未收嫦娥如戲我移照讀書樓

山村暮歸

點點殘鴉過孤村帶落暉籬邊聞犬吠山下有人歸遠

岫連芳塢長林遶翠微雲深認茆屋風細颺征衣樵唱  
同尋徑猿驚爲扣扉夜深燈火下兒女共依依

杜鵑

叫盡三巴月淒涼杜宇聲今人誰與語故主自呼名啼  
血嗟何意前身恨未平轉喉曾有諱弄舌似猶生姓字  
諸禽識君臣易世輕提壺無意緒醉魄謾飛鳴

水碓

機事嗟何巧空村不住春潺湲因借力俯仰若爲容盡

日勞雙杵疏泉隔幾峰無人長軋軋助我爲淙淙碓下  
僧長喜溪邊婦亦慵香厨炊已辦時借野雲封

雁足書

中郎沙漠外祇乳事何如賴有雲中雁能傳足上書衙  
蘆來內苑繫帛自穹廬地說荒寒極人稱老病餘史徒  
誇問犬詩莫詠烹魚青鳥仙家使吾今益信渠

笛裏

笛裏愁千緒更長憶故山今人吹古曲漢月照秦關霜



竹和聲切匡牀倨坐閒一輪秋塞外萬嶂野雲間此夜  
聽渠弄何時招我還回思帝城角花影映朝班

宋元詩會卷四十九

欽定四庫全書

宋元詩會卷五十

兵部主事陳焯編

高九萬

號竹磻理宗時人與劉後村孫季蕃善後村寄  
詩云行世有千首買山無一錢其風致可想

卜居

結屋離黃道開門對白沙一莊千古月三徑四時花  
客至旋沽酒身閒自煮茶相聞蟲鳥外不復聽喧嘩

春日湖上

清波門外放船時  
盡日輕寒戀客衣  
花下笑聲人共語  
柳邊樯影燕初飛  
曉風不定棠梨瘦  
夜雨相連薺麥肥  
最憶故山春正好  
夜來先遣夢魂歸

送方秋崖出都門

忠言歷歷未曾行  
盡載圖書出帝京  
餘子但知才可忌  
先生當以去爲榮  
門闌竹石關心久  
部曲溪山照眼明  
長嘯歸歟莫惆悵  
湘江風定自潮平

江居晚詠

家住清江江上邨  
江雲山影自平分  
幾回晚起開門看  
不見青山見白雲

過寶蓮山

山下爲韓王府

拂曉官家簿錄時  
未曾吹徹玉參差  
旁人不忍聽鸚鵡  
猶向金籠喚太師

時侂冑賜死  
玉津園側

春情

天涯海角水雲寬  
人在吳頭楚尾間  
彈徹箏篴難寄恨

海棠深院獨憑欄

真山民

字山民文忠公之孫宋末隱居不仕但自稱山民諱其名氏識者服君才節謂德祐間復出一淵明也

幽居雜興

松桂小菟裘山扉幽更幽蜂王衙早晚燕子社春秋鬢  
禿難遮老心寬不貯愁年來把鋤手無復揖公侯

光霽閣晚望

一閣納萬象危闌俯渺茫白沙難認月黃葉易爲霜宿  
鳥投煙嶼歸樵趁野航孤吟誰是伴漁笛起滄浪

興福寺

爲厭市喧雜攜詩來此吟鳥聲山路靜花影寺門深樓  
閣莊嚴界池塘清淨心松風亦好事送客出前林

修真院訪崔道士

竹扉蒼蘚墻林下小丹房風定香煙直月斜簾影長淪  
茶泉味別點易露痕香安得棲塵外求師却老方

春遊和胡叔芳韻

春光潑眼明占勝得新亭  
棠醉風扶起柳眠鶯喚醒非  
無杯泛綠安得鬢皆青  
且事日爲樂歌聲莫暫停

山亭避暑

怕礙清風入丁寧  
莫下簾地皆宜避暑人  
自要趨炎竹色水千頃  
松聲風四簷此中有幽致  
多取未傷廉

三山旅夜

獨坐本無況淒涼更旅中  
檻低簷碍月牕破紙吟風  
隣



館笛三弄譙樓鼓二通半觴聊自適新荔擘輕紅

泊白沙渡

日暮片帆落渡頭生暝煙與鷗分渚泊邀月共船眠燈  
影漁舟外湍聲客枕邊離懷正無奈況復聽啼鵲

夜話無上人房

蒲團一榻上坐到夜將分牕月燈昏見巖猿雨歇聞茶  
甌勝飲酒禪語當論文只恐紅塵跡浣師松下雲

獨坐

寒齋淡無味孤坐思悠悠時事三緘口年光一轉頭有  
書遮老眼無藥療閒愁假使丹心在衰遲也合休

曉行山間

出門誰是伴只約瘦藤行一二里山徑兩三聲曉鶯亂  
峰相出沒初日乍陰晴僧舍在何許隔林鐘磬清

山間次季芳韻

好山多在眼塵事少關心風竹有聲畫石泉無操琴許  
猿分野果留鶴守雲林不是閒邊客誰來此地吟

溪行

春煖溪西路行吟又幾迴  
水清明白鷺花落失青苔  
雲過日吞吐樹搖風往來  
漁歌聽未了欲去又徘徊

除夜約張梅境飲

今日又除夕君能爲我來  
燭光紅照席酒浪綠搖杯  
臘帶吟愁去春隨笑臉回  
相看俱健在莫管歲華催

宿寶勝寺

苦吟吟未了只向兩廊行  
月去塔無影風來鐸有聲  
禪

心隨水淨佛眼共燈明安得雲邊住與僧分此情

兵後寓舍送春

觸景多懷舊凭欄易愴神飛花遊蕩子古木老成人  
世換山如醉田荒草自新鄉關渺何處回首暗風塵

樓居

攜書來過此便覺少塵埃簷冷留雲宿牕明報月來  
閒愁山隔斷幽夢鳥呼回湖海元龍氣從渠俗子猜

蘭溪舟中

一舸下中流西風兩岼秋櫓聲搖客夢帆影挂離愁落  
日魚鰕市長煙蘆荻洲篙人夜相語明發又嚴州

清明

清明今日是原上一經過新葬塚無數未來人更多此  
生曾悟否不樂復如何莫待澆墳土樽前且醉歌

臨江晚行

茅舍亂雞聲疎林淡見星霜輕留草綠霧暗失山青蹤  
跡去來燕交遊聚散萍浮生原是客不必恨飄零

寄郭月蓬

煙波秋草外活計一漁篷  
淡月明寒葦新霜醉曉楓  
身雖殊出處道豈有窮通  
俯仰看人面何如數過鴻

舟中峽口

亂山如碧玉處處見鵑花  
水漲傍分港舟行倒走沙  
宿依沽酒市飯過釣魚家  
喜脫風波險推篷數暝鴉

次韻章劔溪山居

想無書赴隴林鶴莫驚猜  
曳杖雲同出開簾山自來  
池

堪供洗硯籬不碍觀梅靜倚長松立藤花點翠苔

宋道士同遊白雲關

扶攜方外友來入白雲關八九峰如畫兩三人倚欄棋  
聲敲竹外簾影落花間一曲瑤琴罷翠陰生晝寒

晚春

有恨青春老無營白晝長葉新林換綠花落地生香雨  
意一番足人家百事忙爲儒竟成誤悔不早農桑

江樓秋夕

樓高古城遶無奈漏聲催幽夢風吹斷新吟月送來江  
長漁唱遠雲冷雁聲哀明日重陽酒黃花開未開

初夏訪劉道士

白雲隨杖屨伴我到山房暑薄疑天別林深見路長水  
芝皆道味花竹亦詩香更待荷開後來分半榻涼

春行

東風物物新花外步清晨蕉葉卷舒雨鳩聲問荅春園  
林三月景詩酒百年身試數交遊侶如今有幾人



秋晚

暮色入江郊  
霜風兩鬢毛  
笛聲吹月落  
詩興挾秋高  
謝絕南柯蟻  
留連左手螯  
孤燈竹牕底  
危坐一歌騷

李修伯山居

俗子自不到幽扉  
何必扁苔衣  
和月卧山雨  
雜泉聽有髮  
徒斑白無名入汗青  
未應閒此事  
尚可掃玄經

道逢過軍投宿山寺

窮途欲馬往  
薄暮此相投  
蟋蟀數聲雨  
芭蕉一寺秋  
鄉

關來枕畔時事上眉頭長嘆爲僧好今逢更說愁

春曉雨

破曉簷花未放乾披衣和夢倚闌干釀成苔暈地猶溼  
老盡鶯聲風正寒無客醉敲金鞦韆響有人睡怯翠衾單  
牡丹一夜成消瘦下却朱簾不忍看

西湖圖

兩袖春風一丈藜等閒踏破柳橋西雲開遠嶂碧千疊  
雨過落花紅半溪青旂有情邀我醉黃鶯無恨爲誰啼

東城正在桃林外多少遊人逐馬蹄

隱懷

樣不趨時合便休都將往事付東流眼看浮世自今古  
迹與孤雲同去留泉石定非騎馬路功名不上釣魚舟  
有時但得句無問只與漁歌互唱酬

遊鳳棲寺

十載重遊古鳳棲連宮新遶綠楊堤欲談世事佛無語  
不管客愁禽自啼苔滑空廊妨散步塵昏老壁失留題

僧家田地鄰家種菜甲春風綠滿畦

漁浦晚秋

西風吹夢越中遊剪剪輕寒入短裘  
鴈字不將鄉信寫蛩聲空和旅吟愁  
郵亭冷雨孤燈夜漁市斜陽一笛秋  
是處山川即吾土仲宣何用怯登樓

泊舟嚴灘

天色微茫入暝鐘嚴陵湍上繫孤篷  
水禽與我共明月蘆葉同誰吟晚風  
隔浦人家漁火外滿江愁思笛聲中

雲開休望飛鴻影身即天涯一斷鴻

題永嘉夢草堂

留得斯堂萬古名江山不敢閉英靈池光曾染吟邊墨  
草色猶如夢裡青南浦詩香流未歇東家魂冷喚難醒  
當時園柳俱塵迹惟有鳴禽尚可聽

連城春夜留別張建溪

飛絮遊絲客子心連城那忍遽分襟青燈應見詩情苦  
濁酒不如交味深一榻暖風棲竹屋半闌淡月立花陰

離懷今夜先收拾盡付明朝馬上吟

夜坐

匹馬平生汗漫遊如今寂寞老林丘  
小牕半夜青燈雨幽樹一庭黃葉秋  
懶看世情寧睡去怕傷時事莫吟休  
寒蛩可是知人意未到莎根只說愁

東粵廟

顏欄斜照網蛛絲陳迹淒涼萬古悲  
柘水尚鳴亡國怨山松曾見受封時  
碑因苔蝕無完字城爲田侵失舊基

當日東甌知幾戰如今贏得一荒祠

歲暮

顏不常朱鬢易斑流光難駐雨跳丸一年又是等閒過  
百歲只消如此看把酒何曾長在手種桃能得幾凭欄  
痴人醉夢不知醒日夜雙眉抵死攢

三峰寺

寂寞煙林噪亂鴉青鞋步入野僧家雲深不碍鐘聲出  
日轉還移塔影斜廊下蝸粘沿砌蘚佛前蜂戀插瓶花

竹牀紙帳清如水一枕松風聽煮茶

江頭春日

春暖旗亭煮酒香醉醒始悟是他鄉  
駕言行邁路千里豈不懷歸天一方  
春事漸消鶯語老離愁偏勝柳絲長  
無聊莫向城南宿淡月梨花正斷腸

初夏

一葉熏風帶暑回雨天濃翠與庭槐  
不隨春去鶯猶在好競時粧榴又開  
剪尺旋裁新白苧杯盤聊薦舊青梅



篋中敝扇投閒久依舊團團入手來

幽棲

鶴護松扉久不開蒲團端坐思悠哉故交只向夢中見  
閒事不經心上來雙屐躡雲春採藥一筇挂月夜觀梅  
東風似見山童懶自與幽人掃徑苔

讀劉元城言行錄

一掃權奸九十章七州不憚歷炎荒黃梁富貴百年短  
青史是非千載長丞相雖存心已死先生既葬骨猶香

向令鐵漢常留在天下何緣有靖康

秋夜次葉一山韻

自笑秋來似轉蓬偶然飛落過山中一燈幽館菊花雨  
孤枕小樓梧葉風涉世悠悠旋磨蟻懷人杳杳寄書鴻  
浮生何預光陰事抵死相催作老翁

杜鵑花得紅字

愁鎖巴雲往事空只將遺恨寄芳叢歸心千古終難白  
啼血萬山都是紅枝帶翠烟深夜月魂飛錦水舊東風

至今染出懷鄉恨長挂行人望眼中

客中遇鄉友李芳遠歸省親

河梁邂逅話襟期獵獵西風透袂衣酒臉未隨紅葉醉  
鄉心先逐白雲飛客中送客難爲別山上安山胡不歸  
借使家書君可寄此間無處問庭幃

山人家

片雲隔斷嶂西風三兩山花屋角紅幾畝桑麻春社後  
數家鷄犬夕陽中拾薪澗底青羣婦倚杖簷間白髮翁

我亦願來同隱者種桃早晚起東風

朱溪澗

路轉峰回又一村天寒大半掩柴門雲融山脊嵐生翠  
水嚼沙洲樹出根任擁重裘風亦冷未投荒店月先昏  
今宵只傍梅花宿贏得清芬入夢魂

閨中

敢咎章縫解誤人甘於閒處着閒身腹中書在溫仍熟  
夢裏詩成記不真引鶴徐行三逕曉約梅同醉一壺春

今朝有喜誰知得  
新換銜頭號散民

春曉山行

風掃連陰作快晴  
瘦筇伴我出山扃  
路從初日紅邊過  
人在野花香裏行  
古水殊無趨世態  
幽禽懶作弄春聲  
棕鞋踏遍山南北  
只與白雲相送迎

梅仙山

梅福鍊丹地

西都不知壽安用  
獨長年縱有丹爐在  
難吹漢火然

螢火

微踪一腐草霜重不禁秋想悟浮生短常爲秉燭遊

吉水夜泊

入夜始維舟黃蘆古渡頭眠鷗知讓客飛過蓼花洲

草

草枯根不死春到又敷榮獨有愁根在非春亦自生

水墨海棠

不將翠袖捲紗紅怪得陳玄奪化工想是太真春睡足

夢魂正在黑甜中

遊春嘲年少

錦袍朱帶玉花驄  
著意追歡紫陌東  
只道春風屬楊柳  
不知楊柳有秋風

山間早春

小桃枝上認年華  
隨分紅開一兩花  
將謂春風只城市  
也吹春色到山家

三月晦日

九十風光能有幾  
東風遽作遠行人  
樽前莫惜今朝醉

明日鶯聲不是春

吳龍翰

字君式歙人與  
方岳同時同里

牛首山觀揚子江

巨靈擘破此山石  
鞭起九龍入空碧  
山分爲兩合不成  
夾住長江數千尺  
九道驚湍相擊撞  
雷聲怒發誰敢當  
金牛怪獸不可數  
往往殺氣侵肌涼  
嗚呼蜀道古來難  
燒棧能斷人往還  
一夫可敵百夫勇  
天險惟有秦函關



固知長江當城壁立此界限分南北東南佳氣無窮年  
此江未必成桑田君不見逆亮百萬鼓腥風海鯨出闕  
天掃空書生不能長鎗與大劔只坐帷幄收奇功

題國直先伯祖海潮賦後

銀山突兀滄海頭夜半鼓噪萬貔貅爭雄角力轉坤軸  
旋磨塵世偕浮漚朝朝暮暮自消長誰言於此隨海鯨  
鳴革裹尸已塵土未必怨怒卒不休看公立論屈前輩  
筆端有力挽萬牛孤峰絕岸氣象古亦復燦燦珊瑚鉤

分明掘見陰陽根判斷造化之深幽玄機發泄天帝嗔  
此文政恐雷電收不然亦似畫鳥跡長夜鬼哭聲啾啾  
公自騎驄去不返滿江明月蘆花秋

西湖曲

十里風光煙水白嵯峨帝城紫霧隔笛聲吹斷蒲葉風  
鷺飛界破青山色湖波鱗織成縠翠葢紅幢機上簇  
長安富兒美少年馬蹄踏踏香塵撲畫舫誰家窈窕娘  
半額鵝黃時樣粧玉手折花嬌無力花枝半折銀絲長

隔花躊躇意相屬稍稍談笑聞餘香  
顏陽西落漢水遠無計問覓雙瓊璫  
巫山高哉但入夢安得挿翮飛其傍  
君不見吳姬采蓮自唱曲君王尚在舟中宿

白紵詞

吳宮煙水碧迢迢如鱗金屋凌琅霄  
北方佳人顏如花素衣濯濯明朝霞  
雲母屏風真珠箔香銷金鴨春寒薄  
璧月流光羅綺筵白紵舞殘西月落  
君看月落夜潮平吳江濶兮越江深  
吳王醉去越王醒

嘉禾沈園

景物何其異虛巖人力成清池沈鳥影高樹落蟬聲  
花日樓臺麗香風簾幙輕客來堪一借莫恡百杯傾

感興

閉門逃俗客攜酒過禪關竈古茶煙斷碑殘雨蘚  
癸秋僧行影瘦夜鶴病翎寒片月隨人到孤琴對佛彈

詩境

流水環詩境未容塵土侵步迂莎徑曲坐占草堂深  
秋

句蛩分和山杯鳥勸斟好懷無客共相對一瑤琴

謾題

放曠疎林下清風吹鬢毛  
傍梅讀周易對酒歌離騷  
詩思秋雲淡古懷明月高  
五湖天地別煙水綠平篙

夏日書事

園林數間屋長掩竹芭籬  
亭柳拂棋局瓶花落硯池  
蝶狂如被酒蟬咽似吟詩  
脫帽挂蛭石涼颼入鬢絲

吳越歸秋晚

湖海歸來晚園荒菊幾叢秋山吟骨瘦霜葉醉顏紅  
影寒溪上懷人落月中青燈滋味永不用哭途窮

春晚郊行

芒鞋竹杖出柴關簡點園林脚不閒翠幄初張花作局  
錦棚成列筍爲班煙波鷗鷺春風外桑柘牛羊夕照間  
野興不須邀客共芳樽濁酒對黃山

贈劉後村

騎却青鸞上禁林巖巖聲價重南金花磚日轉瓊筵暖

蓮燭星歸玉漏沉  
翰墨挈來三昧手  
絲綸畫出九重心  
春風已築沙堤路  
天上虛皇屬意深

樂府

妾心江岸石千古無變更  
郎心江上水倏忽風波生  
殘月小樓西鵲啼思欲迷  
妾夫在天南何不那邊啼

春晚畱淮上

淮山歷歷春雲澹  
淮水湯湯夜月輝  
此處杜鵑啼不到  
江南行客未成歸

久客買舟西還

萬里煙波興渺然  
愁心繫住灞橋邊  
歸裝詩少不成載  
自折梅花湊滿船

水邊早梅

數花黯淡帶寒煙  
漏泄春光矮屋邊  
會被清池寫疎影  
一枝分作兩枝妍

宋伯仁

字器之湖州人南宋淳祐間爲淮南鹺官詩多清婉可誦然觀其所稱執政諸作邪正不分一以贊



頗爲事其所趨尚如是則  
發諸心聲者亦可概見矣

歲旦

居閒無賀客早起但如常  
桃板隨人換梅花隔歲香  
春風回笑語雲氣卜豐穰  
栢酒何勞勸心康壽自長

久雨

暗數春來雨曾無兩日晴  
樹連山莫辨橋與水俱平  
閉戶惟應懶逢人且問耕  
海棠花落盡顚顚幾流鶯

雪後

暖地難爲雪春天易得晴落梅狂客意啼鳥故園聲愁  
樂從他事湖山寄此生願將身與世一葉等相輕

悶甚

醪醕開已殘窗戶尚輕寒往事多因拙清尊強自寬對  
妻憐病久顧影得心酸更展淵明集從頭一再看

妙智庵

結屋古山巔源流未有年便非真隱者且喜得安禪石  
洞雲同卧茶鐺客到煎我來當小憩詩滿夕陽天

蘇州有感

秋意滿姑蘇扁舟憶五湖  
鈴聲邊報急帆影客心孤  
野港青如染遙山淡欲無  
千年遺跡在過眼只斯須

雨中

終日翻盆雨池亭晚更涼  
對琴思古意釀酒惜韶光  
綠漲便鷗懶殘花笑蝶忙  
高田皆可挿好與報君王

春半

春到已多時遊人替衲衣  
柳眠鶯喚醒花瘦雨添肥  
官

事癡能了人情久易非一貧能自守贏得掩柴扉

漁父吟

小舟如雁鶩穩穩下波心蓑笠幾風雨江山無古今清  
歌鳴短櫂紅葉滿疎林一醉不知世前村月未沉

值雨

吳陵兩月雨留連來問瓊花落砌邊市酒未銷狂客恨  
塞鴻先作嫩寒天只憂松下無三逕不管囊中欠一錢  
揚子江頭風正急未知何日買歸船

題象山縣棲霞觀應真亭簡住持張羽士

杜鵑聲裏立東風  
山色應憐鬢已蓬  
二麥曉寒新雨後  
一年春事落花中  
醉斟浮蟻邀仙客  
笑揖飛鷗問釣翁  
簷外萬竿君子竹  
虛心能得幾人同

村莊即事

青旗獵獵又村莊  
僊景還他是故鄉  
叟有七旬頭未白  
山無重數葉初黃  
稻畦明月家家酒  
茆屋清歌處處霜  
晚菊一籬秋欲老  
客懷牢落愧重陽



登海陵城

淮楚年年一番秋  
西風慣識古譙樓  
金湯城壁休清野  
玉帳英雄未白頭  
霜草萬家人冷落  
凍雲千疊雁綢繆  
中原無計堪修整  
且對屯兵說近愁

出陸

吳陵咫尺是維揚  
徒步方知去路長  
漁屋試霜蘆葉老  
酒家留坐豆花香  
秋光淺淡人同瘦  
雁影參差客共忙  
僕子莫嗟行李重  
擔頭強半舊詩囊

邊頭老馬

解下韁繩便欲眠，絕無筋力可勝鞭。  
霜蹄遍識淮南地，夜草猶吞塞北煙。  
怕逐綵旗排偃月，寧思金鐙趲朝天。  
華山自有安身處，試問將軍更幾年。

夜過烏鎮

望極模糊古樹林，彎彎溪港似難尋。  
荻蘆花重霜初下，桑柘陰移月未沉。  
恨別情懷雖戀酒，送衣時節怕聞砧。  
夜行船上唱歌意，說盡還家一片心。

簡張寄翁秀才

徽外琴聲局外棋此心能得幾人知縱橫謾說三千字  
陶寫須吟百一詩秋到蓼花蟬噪後雨敲荷葉釣歸時  
西湖儘着張公子定把吟蓬逐月移

賀鶴林吳尚書赴召隆興

鸞翔芝簡下溪堂醉夢驚回午正涼寵報帝俞催宰相  
宜將州紱召文昌頻花襟袖宮花近詩草簾櫳諫草香  
大化一新多吉士卷阿歷歷告成王



寓西馬塢

十畝荒林屋數間，門通小艇水灣灣。  
人行遠路多嫌僻，我得安居却稱閒。  
樽酒相忘霜後菊，一時難盡雨中山。  
何年脫下浮名事，只與田翁賸往還。

呈留耕先生王侍郎

夜雨篝燈夢未閒，十年殊愧屋頭山。  
喜聞鐺脚濤聲起，不憚吟髭雪樣斑。  
漁釣醉歌人所願，功名心事國相關。  
辟書笑倒梅邊鶴，盡在先生指顧間。

兀坐

對坐清清一穗香  
悄無人語日偏長  
硯盤數點梅花片  
暗引遊蜂度粉牆

湖上

一泓寒玉浸青山  
粧點樓臺夕照間  
歌管滿船春未去  
惜無人伴白鷗閒

紙鷺

弄假如真舞碧空  
吹噓全在一絲風  
惟慚尺五天將近

猶在兒童掌握中

王柏

字會之金華人其祖師愈先受業於龜山復從考亭南軒諸公遊淵源有素柏少慕諸葛亮自號長嘯年踰三十始知家學之原更以魯齋聞同邑何基從黃幹得朱熹之傳即往從之授以立志居敬之旨其學日粹於是當路聘爲麗澤上蔡兩書院師鄉之耆德皆執弟子禮其卒整衣冠端坐弗少亂也國子祭酒楊文仲請於朝諡曰文獻

和葉聖予小桃源韻

二仙何如人夫豈古隱士道成邈沲寥佯卧不再起鸞

鶴舞松聲蕭騷快心耳金竈清塵生餘丹不輕委我來  
桃源遊直窮路所止飛蘿搖春煙素雪噴清泚何時架  
草堂深入此山裏翛然逃世慮鍊魄繼遐軌

送希夷之江西

小雨歛輕塵秋聲滿亭驛驅車過南浦別懷徒襞積世  
道斯陵夷爲善不自力一朝魯兩生爲人作行色誰知  
離索悲有甚萬鍾失

和寬居見懷

北望戲馬臺荆榛滿中路英氣一何多懷古渺難潯山  
河腥日月虎豹沐雨露累累楚猴冠異哉天所賦豈無  
濟川才淹留秋不暮清風從何來洒洒定吾故贈我金  
琅玕鑿落雙魚素

秋熟

西風不力征老火未甘退蟬聲亂耳繁癡蚊健始最一  
雨從天來不復有故態天序自分明人心其少耐

題定武蘭亭副本

玉華末命昭陵土蘭亭神蹟埋千古率更搨本入堅珉  
闕帝歸裝按定武薛家翻刻愚貴遊舊石宣和龕御府  
邊塵橫空飛渡河中原荊棘鳴輦鼓維揚蒼茫駕南轅  
百年文物不堪補紛紛好事競新模傾歆醜俗亡遺矩  
如今薛本亦罕見髣髴典刑猶媚嫵清歡盛會何足傳  
右軍他帖以千數託言此筆不可再慨然陳迹興懷古  
今昔相視無已時手掩塵編對秋雨

舟中和聖予 二首

桐江波漸滑霽色午方開香火嚴蘭若煙霞老釣臺崖  
高微徑險水轉萬山回欲訪先生裔相從買一杯  
江濶風帆急潮回沙露痕寒林無剩葉茅舍各成村雁  
落煙波渺鴉歸野色昏未知孤客擢今夜泊誰門

野興

文字飢難煮爲農策最良興來鋤曉月倦後卧斜陽秋  
稼連千頃春花醉幾場任他名利客車馬逐康莊

蘭

早受樵人貢春蘭訪舊盟謝庭誇瑞物楚澤擷芳名蒼  
玉裁圭影紫檀含露英奚奴培護巧苔蘚日菁菁

催雨

人世如居甌驕陽不可鉏未聞芻作狗安得夢維魚賦  
歛民生槁干戈國計虛安危關一飽雨意莫躊躇

鄭起

原名震字叔起號菊山閩連江人屢舉不第晚爲  
安定和靖書院堂長曾伏闕論史嵩之及鄭清之  
再相起復登門大罵被繫下獄  
鄭罷相始免詩有清雋集




再登南樓

客中重上倚層臺  
天濶雲收八面開  
鴈帶岳陽秋曉過  
浪涵巴峽影西來  
諸營種柳今何在  
老子登樓得幾回  
自是江山雄壯處  
興亡不必問寒灰

爛柯山

春風萬古洞門開  
塵世興亡定幾回  
碁局至今無處覓  
樵人于此遇仙來  
飛梁橫跨丹虹影  
絕頂平鋪白玉堆  
天下紛紛無好著  
斜陽下嶺共徘徊



宋元詩會卷五十